

408
83

QUÆSTIO MEDICA,

*Quodlibetariis disputationibus manè discutienda in Scholis Medicorum,
die Jovis. nonâ Februarii 1713.*

M. ANTONIO DE JUSSIEU, Doctore Medico, in horto Regio
Parisiensi Botanices Professore Regio, è Regiâ scientiarum
Academiâ, Præsîde.

An corporis functiones absque Fermentatione?

I.

QUAM delectabilis merè philosophanti mentis contemplatio, tam utilis Medico fabricæ corporis cognitio. Ille mentis naturam speculatus indagat; hic vero corporis structuram, usumque ex Mechanices legibus eruit. Quid in sterili mentis indagatione Philosophus hæreat? ulteriorem Medicus scalpello & analysi corporis notionem expiscatur. Nec nimis sibi placeat Medicus qui Vætis, Trochleæ, Anthliæ, solidorumque vim & potentiam, fluidorumve gavitatem senserit: rimetur ultrà quæ natura, textura, conformatio, Vætis, Canalis, Trochleæ, Chordæ; quæ quantitas, qualitas & motus fluidi. Quem obvia solidorum, fluidorumve motûs ratio moratur, is extimam speciem corticemve delibat. Quis intimas corporis vires Mechanicarum auxilio legum perspectas habeat? Cogites in homine amarum, salsum, dulce, acidum, acerbum, insipidum, aliaque sexcenta, quæ, pro copiâ & viribus, variis pollent qualitatibus. His temperatis ritè succedunt functiones; his præposterè redundantibus, læduntur. At, inquires, duæ tantùm in sanguine partes apparent rubra & alba; quid ultrà tendat Medicus? Frustrâ obloqueris: vel ipsi sensibus & Analysisi deprehenduntur in liquoribus principia varia, salina, sulfurea, volatilia, terrea & aquosa, ex quibus illorum proprietates & mutationum leges elucet. Insunt cîgò corporibus primò oculorum intuitu non deprehendenda variarum mutationum principia. At, cujus ope fient illæ mutationes; an simplici motu fluidi, vel triturâ? Nequaquam. Principiorum conflictus oriatur necessum est, quò moveantur, quò defæcentur, aut alia in alia immutentur liquida. Is conflictus, motus intestinus, Fermentatio.

II.

FERMENTATIONIS causam inquires; habes in variâ variorum salium configuratione, aut principiorum diversitate. Acida si spectes, in fusi formam utrinque aculeata, alkalia spinis horrida, salsa ex acido & alkali conflata, sulfura ramosa. Salium solutæ partes ita solventis motum sequuntur, ut huic innatent, eoque ut ita dicam involvantur. Tum si quo motu fluidi propellatur acidum in alkali poros, vel sulfurum ramis irretiat; aut acida in acidorum, alkalia in alkaliorum aliter atque aliter configurationum cuniculos impingant; materiæ subtilis motus acceleratur, angustioribus factis meatibus: nec ita accelerari potest, quin validam inferat vim in latera pororum, quâ vi eorum parietes tumultuosa & nonnunquam violentâ agitatione diffingat. Concurrent quoque aëris spirulæ, quæ dum è poris salium aut sulfurum excluduntur, sui juris factæ, & proprio elateri restitutæ commovent partes liquidi expansione suâ ac dilatatione. Quæ variarum fermentationum ratio? diversa quantitas & qualitas solventis, principiorum moles varia, configuratio, aut mixtio, materiæ subtilis motus major vel minor, tum aëris, vis, pondus ac elater, tum aliquandò calor, aut frigus. Hinc variae fermentationes, quæ modò lentæ, debiles, leviores modò, modò validæ, aut quas comitantur effervescentia, intumescencia, calor modò, modò frigûs, modòque flammia. Neque tamen in omnibus corporibus adsunt principia extricata, undè exciteetur fer-

mentatio, nisi accersantur aliundè; quod videre licet in panificio, cerëvisiæ præparatione & in pluribus succis fermentationi idoneis. Accersita itaque principia Fermentativa alterantur; vel enim exaltantur, evaporantur, immutantur, perficiuntur, vel fit earum resolutio, aut corruptio. Occurrant modò vis major & resistèntia, resolutio; si partium cùm inregrantium, tùm essentialium immutatio omnimoda & destructio, succedet corruptio. Nec rarò ex conflictu acidorum cum sulphureis calor intensissimus, aut flamma exurgit, ut patet in mixtione spiritus nitri defæcari cum oleis Guaiaci, Sassafras, Cariophyllorum, vel spiritu vini aut terebenthinæ. Quorsum hæc verò dicta sunt? ut intelligatur, quandò in corpore quovis mutatio aliqua apparet cuius causa lateat, hanc ex fermentatione proficisci. Si quid addubites; musti varias mutationes inspicere? succus ille cùm motu simplici fluidi defæcari nequeat, motus in eo excitatur intestinus, quo tenuia à crassioribus extricantur, ibidemque mutuo coalitu se posita mox expediuntur ac commoventur, novæque proinde salis aquæ & sulphuris combinationes, æque firmiores, & diù mansuræ instituuntur.

I I I.

QUIS hominis fabricam non asserat simplicissimam? ex solidis & fluidis constat mirabilis illa compages. Quàm varia tamen partium textura & conformatio, quàm multiplex earum usus Autophiâ deprehenditur? quàm diversâ fluidorum natura & qualitas Chymicâ arte demonstratur? Solida si spectes, hæc motui gressivo destinantur, hæc visus organum constituunt, in illis gustus, olfactus, auditus tactusque sedes; ibi animæ functionum domicilium, Ventriculus & Intestina atrium in quo cibi præparantur ad totius Corporis instaurationem, Hepar bilis secernendæ officina, Pancreas succi Pancreatici; Cor Anthiæ species quâ truditur sanguis in omnes corporis partes, undè rursus ad cor revehatur. Fluida non minori usu prædita, nec ejusdem indolis, licet ex chylo & sanguine oriunda. Chylus liquor est albicans, cremori hordei similis, subdulcis, alimentorum coctionis opus. Sanguis rubore suffunditur, ex eo per incernicula propria transcolantur lymphæ aquoso-sulfureæ & salinæ, saliva vix à lymphâ discrepans, Urina aquosa & salina, bilis sulfurea tota, insensilis transpiratio & sudor acidum redolens; spiritus animales, pars tenuissima sanguinis: quæ singula liquida suis continentur vasculis ad varia corporis munia. Quam plurimas ergò subeat mutationes chylus & sanguis necesse est, ut absolvantur corporis functiones. Præcipuas indagare libet? Hæc sunt chylosis, hæmatosis, nutritio, accretio & secretio. Chylosis est immutatio alimentorum in pultaceam materiem, quæ chyli nomine venit. Hæmatosis est ipsa chyli in sanguinem conversio. Nutritio est succi gelatinosi distributio, quâ cuilibet corporis parti convenientes apponuntur particule, ut sic tota corporis moles nutriatur & augetur. Secretio est humorum prius præparatorum & diversæ indolis, percolatio per incernicula propria. At undè repetendæ illæ mutationes chyli & sanguinis ad munia corporis obeunda? an ex simplici motu liquidi? Solus per se huic muneri impar est. Triturâ, idest mutuâ actione solidorum in fluida & vice versâ? Molem fluidi tenuiorem reddere potest; sed alienas effingere species, nullatenus. An aqua fluminis à locis maximè distantibus per obliqua & declivia decurrens, totiesve in scopulos allidens eam subit mutationem, per quam à nativo sapore vel colore desciscat? Mutuâ ergò actione principiorum chyli & sanguinis quædam coitio evadit, quâ pristinæ singulorum vires non amplius manent integræ, sed pereuntibus & extinctis singulorum viribus novæ prorsus exsurgunt, ex illorum tamen concursione profectæ.

I V.

AT ne dubites Fermentationi obnoxium esse sanguinem. Alimentorum Analysim variam inspicere. Hæc acre, hæc acidum, hæc aquam, illa volatile, ista sulfur majori copiâ præbent. Chylus analysi subjectus Acida & sulfura offert; nec sanguis aliis turgidus principiis, Acido destituitur, quod immeritò plurimi negaverant, Nuper enim

restis venit * Vir clarissimus. Quod si sexdecim sanguinis libræ in cucurbitâ reponantur, lenique igne foveantur, extrahetur phlegma ad libras decem; residuum in cucurbitâ viscidum erit, quod exsiccatum vix libram unam & semissem pendebit. Hoc in retortâ positum, si primum leni igni, dein violento mandetur, extillabit ad uncias duodecim liquor rufus sale volatili turgens, dein oleum ad uncias quinque, partim liquidum, partim spissum sebi instar. Caput mortuum carbo est levis, unciarum quatuor & semis pondere. Rectificetur liquor ille rufus lento igne, ut sal volatile acre & phlegma inutile separentur, remanebit in fundo retortæ rufus liquor ad unciam unam, fætidus, austerus, acidus, tincturamque heliotropii in colorem rubrum intensum mutans. Rufus ille liquor, si rectificetur ulterius æque acidus erit ac acetum stillatitium. Majorem quantitatem Acidi ex sanguine extrahes, si carbonem, id est caput mortuum residuum ex distillationibus cum siccato sanguine misceas, & igni in retortâ committas priori consimilem operam profecturus. Sudor Acidi indicium præbet, Urina Alkalinum muriaticumque sal refert, bilis sulfurea principia. Nulla ergo dubitatio quin sanguini ipsi varia illa inhæreant principia. Quid plura? Salibus instructa saliva plurimum confert ad digestionem alimentorum & fermentationem excitandam cum iisdem; salibus destituta non secundum naturam peragitur illa digestio atque difficilis est principiorum ex alimentis extricatio. An Chylus simpliciter triturâ in sanguinem convertitur; bulliat, quantum volueris lac, nunquam ruborem induet; sed addas salerni tartari motus in eo excitabitur intestinalis, quo intima partium moles solvetur, alterabitur, quo sulphura carpentur & tenuiora reddentur, unde rubor, Chylus ergo rubedinem adipiscitur, dum ejus principia intimè permiscetur cum principiis veterascentis sanguinis. Nec nutritiæ sanguinis & lymphæ partes motu fluidi, vel nisu solidorum perficiuntur; quantumvis validam institueris vim illam, non sufficiens erit, ut convenienter præparetur *gelatina nutritia*, quæ molles mollibus, solidas solidis, carnosas carnosas, tendinosas tendinosas, osseas osseis, ut ita dicam, suppeditet particulas. Ad seceriones non minus necessaria fermentatio. Earum ratio non desumenda ex fermento peculiari in colatorio hospitanti; nec pororum conformationi, vel imbibitioni tantum trans oram incerniuli tribuenda. Maxiarum secretionum causa, prægressâ sanguinis fermentatio & colatorii cujuslibet peculiaris fabrica. Materia, Chylus & sanguis. Sic sanguis è pulmonibus redux & actuosus, jamque à corde propulsus discretos spiritus cerebro suppeditat. Lymphæ generatio seroso ac gelatinoso sanguinis latici debetur qui exprimitur è sanguine, & per peculiariora vasa fertur, ut rursus sanguini affundatur. Sic sanguis è venâ portâ ad hepar delatus bilefcentes deponit particulas, sic per renes urinam amandat, sic per alia incernicula humores alios excrementitios & excrementitios segregat, qui quidem immutantur pro variâ Chyli & sanguinis constitutione, tum etiam pro variâ eorundem fermentationis ratione.

V.

EXPLORARE corporis naturam est corpus in principia resolvere. Quæ vero tutior via intimas corporis vires inquirendi quam chymica methodus; cujuslibet mixti indoles à peculiari principiorum combinatione petitur. Neque ab artificum industriâ, ignisve adulteratione pendent chymicorum principia. Hæc quippe sunt substantiæ sensibiles, quæ ex omnibus mixtis extrahuntur, nonnunquam absque igne, suntque corporis mixti proprietatum & mutationum fons & origo. Quis ignis vi aquam, sulphur, formare posse se factaverit; combinationem quidem variam principiorum, aut eorundem extricationem promovere potest ignis; sed nullatenus valet ad eorum productionem: regenerantur enim quæ videbantur adulterata. Quis experimenta varia, quibus locupletatur hæc ars dubia ac incerta asserere auit; nonne cuilibet principio sua vis, potentia & configuratio? Numquid à principiorum concursu vario multifariæ sobolescent alterationes; hisse assensum præbebis, quæ sensibus magis patent; quæ verò latent explo-

* D. Homberg Acad. Regiæ Scient. Socius, Sereniss. Principis Aurelianen. Ducis Medicus Primarius Regist. Acad. 1713. Janv.

des? At, inquires, in dolio rite obturato mustum lentè admodum aut nullatenus fermentescit? indene sequitur sanguinem in vasis non fermentescere? urges; vasa continuo cientur motu, simulque sanguis? Lenta & pacata debet esse sanguinis fermentatio, quæ foveatur assiduo vasorum motu, tum ex affasis recrementitiis humoribus. At si fervidior excitetur; quot morbi, quot febres, inde trahunt originem? languidior sit, quanta functionum segnities? Auctarium esto. Medicamenta nùm solâ stimulorum ratione agunt? particulas Chylo & sanguini suppeditant, quibus immutatur, augetur modo, modo imminuitur eorum fermentatio. Hinc Catharticam, Diureticam, Diaphoreticam, Cardiacam, vel Hypnoticam vim obtinent. Nec porro credas horumce medicaminum particulis non affici sanguinem, qui videris purgantia, salivam, sudores, urinæve ciere omisâ catharsi. Jam liquet alterationes tum alimentorum, tum chyli & sanguinis necessarias esse ad varios liquores conficiendos, & ad corporis munia abunda; nec illas alterationes fieri posse nisi fermentorum ministerio.

Ergò corporis functiones non absque Fermentatione.

Domini Doctores disputaturi.

M. Joannes Herment Medicus M. Jacobus Fourneau.
Regis ordinarius.

M. Guido Crescentius Fagon, Regi à sanctioribus consiliis, Archiætrorum Comes, summus horti Regii Parisiensis Moderator, & Academia Regia Scientiarum socius honorarius.

M. Stephanus Franciscus Geoffroy in Horto Regio Parisiensis Chymia Professor, Lector Regius, Academia Regia Scientiarum & societatis Regia Londinensis socius.

M. Ludovicus Franciscus Dutal.

M. Jacobus de Eouges.

M. Franciscus Aignan.

M. Michael Ludovicus Reneaume de la Garanne, Regia Scientiarum Academia socius.

M. Petrus Crescé Schola antiquior Magister.

Proponebat Parisiis CLAUDIUS ANTONIUS RENARD
Parisiinus, Baccalaureus Medicus. A. R. S. H. 1713.

P A R I S I I S,

Apud Viduam Francisci Muguet, Regis & Facultatis Medicinæ
Typographi. 1713.